

光緒辛巳年重修

惠州府志

七

惠郡城北文昌宮藏板

惠州府志卷三十八

人物十

善行

〔宋〕朱誥字少揚歸善人少警悟七歲受論孟再讀輒成誦敏於占對鄉先生陳少微異之曰此子必立身揚名因命以字長嗜學通六經百家言爲文不趨時好在郡庠常爲諸生祭酒誥溫恭愷悌樂道人善士多附之有同舍高年當遷誥以義遜郡守韓磊卿聞之喜曰朱生廉靜有識者也漕使慕其賢辟攝新興僉幕檄至而誥卒子篆登寶慶二年進士授從事郎梅州司法參軍

〔明〕林厚字萬重博羅人永樂丁酉舉於鄉歷江右武隆德

化九江四學職居官二十六年囊無餘積家居動必以
禮鄉閭化之年踰六十一日沐浴更衣呼子姪至前囑
後事因口占云蓋棺萬古無遺恨含笑從容入九泉端
坐而逝祀邑鄉賢

葉頤字養正歸善人景泰甲戌進士歷官湖廣參議能周
貧乏鄉有馮觀保者少孤頤撫育至長仍爲聘娶又有
胡源者十數輩年饑立券稱貸頤皆賑之焚其券後卒
於家祀邑鄉賢

陳瓚歸善鐵爐湖人成化間歲貢仕終廬州教授爲諸生
時讀書翟夫子舍有同舍生亡其資衆疑訴瓚瓚不與
校後獲真盜人始服其量王陽明嘗題其雁啣蘆圖云

西風一夜楚雲秋千里歸來憶壯遊羽翼平沙應養健
知君不爲稻粱謀性固澹定也又有陳漢者當貢而讓
其列其人備禮幣謝之漢驚曰何爲者漢爲足下有老
母須祿養故讓而顧受餽足下自爲孝子而漢爲貪人
乎卒不受後漢亦貢以母歿不赴選又陳之先有名永
吉者嘗遊學鄱陽白鹿洞歸力行古道歲饑捐賑以濟
鄉里按陳氏在有明凡七貢皆有文行可述茲志其最
卓者蓋陳氏世有隱德云

張輅字本素博羅人少從學何宇新成化癸卯舉人爲丹
徒教諭課士勤飭遷九江教授先是學糧司出納者多
侵漁聽入腐惡及輅一繩以法事聞當道時議修學舍

迺發羨金於學令輅自視其工意因是爲助也而輅一以委諸生秋毫不與焉士論稱之祀邑鄉賢

廖任字志尹歸善人正德庚午舉於鄉丁丑偕友譚汝時姚應昌上禮部譚姚後先遘疾舟人以疫告願稍避之任獨撫視不忍去比歿經紀其喪同行者咸愧服授臨武令政不外飾節財裕民興學養士傾帑賑恤無難色甫二載引疾歸棲息西湖不問家事閒居二十載絕跡公庭遇大慶令節雖耄必夙興衣冠拜祀如禮其敬事繼母友愛庶弟尤其大者子七人次子日望最賢能世其孝謹云祀郡邑鄉賢

吳子昌海豐楊安人正德八年歲貢授廣西遷江訓導棄

官養母始爲諸生時見文廟祭器不備白有司爲創豆
籩銅爵悉如古制捐貲倡率建表忠祠於五坡嶺以祀
文丞相嘉靖己丑連歲饑請賑濟自出粟三千石以助
全活多人督學章樸庵獎諭曰棄官養母孝也創祭器
建祠宇義也出粟救荒仁也修此三者可以爲士矣

莊哲字子明河源人幼敏而好學年十一遊庠十五食餼
以貢歷惠安東平南海訓導陞樂會武緣教諭所至課
士有聲致仕歸與鄉老倣耆英會詩酒往來郡嘗舉鄉
飲卒年七十六

駱達駱韜歸善人性孝嗜書有智畧正德間河源賊青頭
仔等五巢蜂聚東西江多被殺掠府縣乏兵達與韜率

興塘社鄉兵奮力勦平當道欲官之辭詣闕陳歸善諸縣貧苦狀奉旨永免興塘夫役民立祠祀之

利錦歸善人性樸約嘗讓大父之產以資叔有友麥陶黃劉四姓初鬻業於錦後子孫貧皆還其券興甯余大邦解糧寓錦家有急回主僕俱歿於途余子不知糧寶所在錦爲覓全還之人高其義子賓嘉靖壬午鄉薦令新化有聲擢南御史封錦如其官

曾膺璿博羅人嘉靖四年鄉薦性嗜書而耿介公車過處州省婦翁車郡丞贈遺一無所受獨索浙載籍後令漳平與上官一語不合輒引去囊無長物亦以聞載籍自隨家居四十年誦讀外未嘗與人事肅客之居不容旋

馬邑令顏雅重之

余續字思繹博羅人折節讀書年三十始補邑庠生督學
魏校講學羊城按郡縣弟子良者檄取受業因咨訪諸
生賢否而進退之或借以報復恩怨續惟進其賢者而
已與胡定會確爲石交道德相砥礪比歲薦年已六十
雖尙健竟不行和歸去來辭以見志家居行鄉約鄉人
敬憚之御史陳儲秀督學林雲同咸表其間湛甘泉稱
爲躬行君子嘗與薛侃論學曰知行有合一者有不能
合一者如易知死生之說知鬼神之情狀豈能合一乎
且知行不合一尙非學者大患言行不合一爲可慨爾
侃以爲名言卒年八十六

吳可因字道甫海豐金錫人嘉靖甲午舉於鄉吳爲海邑望族家素封可因淡泊自甘服食一如寒士是邑少仕進一或登薦輒武斷鄉曲以求厚利可因獨恥之鄉居數十年惟留心學問不與外事縣官罕得接見可謂鐵中錚錚者

歐陽宏字任重歸善水背人家貧恬澹不競少就塾師諸生夜讀宏但默坐師怪其無聲詢知因無油師乃使就旁舍共燈讀嘉靖己酉舉於鄉署河南孟縣教諭知福建永安縣清操一節以不耐煩劇乞歸結屋官橋之野四無人居環堵蕭然盜賊不忍窺其戶楊起元造訪之宏倚杖出迎年已八十有一繩牀敝席非人所堪也臨

別請教曰清心起元爲之悚然

吳相字廷佐歸善縣南門人兄瞽無嗣存歿厚事之嘉靖間以貢訓文昌遷霍邱教饒藩教授奏掌淮藩宗學數載歸年高德邵太守前後禮賓筵者十有三行鄉約以相爲表率人皆翕服云祀郡邑鄉賢

李學顏字叔和河源曾田人父景星豪爽有方畧訓五子實始儒業學顏其長也由邑庠貢太學母老不仕善訓子尤與桑梓同憂樂初曾田人欲鼓衆修怨於上官學顏爲陳利害示以憲法衆解去後王師下諸壘而曾田以無事獨完又嘗謀復河源故城以避水患衆難之萬厯壬午大水漂沒無算衆始悔學顏申前議首捐貲躬

爲巡工城復而完邑永賴之以子燾貴累封至中大夫
年七十餘卒祀邑鄉賢

黃英博羅人家世積善至英益增修之周貧掩骼諸善事
無不樂爲平生不涉訟不履公庭以子縉貴封中書舍
人

林休字裕甫博羅人嘉靖乙丑進士歷知亳州左州調嚴
州同知加意造士擢知銅仁府丁憂起復坐文書失實
謫知滁州未幾自免歸爲人木訥少文蓋古長者父夔
別有傳

黃需字惟溥博羅人明經教授從學甚衆所居不蔽風雨
自若也少爲豪暴所凌破甑釜絕炊煙需弗爲忤後豪

暴死不能歛仍厚賻之長子流芳成進士就養松江夢
天雨粟歸而邑大祲竭力賑濟受封後角巾野服邑令
造廬每謝弗見臨終誦老氏濁以靜之徐清安以久之
徐生語授二子其宅心和易孝友敦睦儼有陳太邱風
流芳最知名有傳仲子紹芳以貢爲高州司訓秉節端
方人不敢干以私而施予獨厚流芳子元啟孝友著聞
八歲伸紙成文萬厯己酉鄉薦文章德誼爲湯嘉賓袁
了凡焦弱侯鄒南皋所推重一生不事干謁潔已恤人
稱其世德

李茂昌長甯長吉都人先是嘉靖間未建縣土賊朱廷福
李亞元糾黨萬餘巢踞十八洞流劫惠韶積十三年而

當事玩不以告茂昌義憤乃詣闕上狀情辭剴切於是
廷議會剿敕御史陳聯芳督軍誅賊賊平立縣民賴以
更生云

劉大魁字士登歸善人父早世事母孝推誠與人廉於財
慎於行鄉里重之時新置永安縣割籍補弟子員祖簡
爲諒江州判死事大魁常以是教其子玉則玉則以萬
厯中歲貢仕全州以廉能著

李瑱長甯松園人隆慶時建置邑城瑱躬親督理生平急
公趨義多類此知府吳名琅獎以匾曰績著鄉閭惠郡
建文場身先勸捐不憚勞苦知府復以斯文首倡匾獎
之瑱蓋松園李姓始祖也

車彩博羅人幼補弟子員家貧事母能盡菽水歡撫少弟
勤文業處宗黨常下人未嘗有所競當貢再讓最後始
應萬厯二年貢任閩德化訓導五年乞休平生活澹退
讓有如此

車鶴年博羅人少有才名不修邊幅而儀觀甚偉補郡庠
生衣敝不恥督學召問大嘉賞之數奇不弟以萬厯元
年貢任肇慶訓導時制府修端州誌纂輯多委任之遷
恩平教授歸爲人澹樸恬永周慎謙和始終一節云

姚應明海豐人事嫡母備極志養處異母弟推肥處瘠生
平好學課子嚴長子恭天啟壬戌進士有傳次敬丁卯
舉人應明居鄉誠樸寬仁峻飭族戚僮僕凡漁利侵人

之事一切痛絕而救菑恤貧施濟尤廣嘗刻醒心錄家訓以垂教爲子貴愈謙抑邑人立碑頌德比之陳太邱王彥方以子恭仕封湖州歸安知縣卒祀邑鄉賢

葉珠字吉甫海豐人業儒生平剛介無不可告人之事少失怙恃喪葬如禮家世雖素封而儉樸不變分產割腴以厚兩弟視姪如子課兒孫輩必繩以義無蹈邪睦族恤鄰急難周乏崇正己巳邑大荒捐穀六百石賑活無算乙亥海寇逼復捐四百石助練鄉兵衛城堡長子高標成進士益自謹厚累封禮科左給事中年七十一仲子子維菱登崇正己卯賢書

黃卿海豐人早失怙事母以孝稱兄弟白首同爨性好施

每焚券以恤貧不能償者崇正辛未大饑出穀倡賑邑
令獎之建各祠橋多捐助仲子德燦登崇正己卯賢書
鄭大化字公信歸善人少補郡諸生慎交遊重然諾守祖
訓卻非義財嘗拾遺金返其主晚益恬退究性命之學
敝廬風雨怡如也子紹武以鄉舉仕別有傳

陳讚字去羨博羅人煥遠孫也讚祖頡以歲薦授浙諸暨
司訓署縣多奇政讚亦以明經起家常誨子姪爲人當
以天下爲公先宗祠後私室急烝嘗緩家食故讚每年
館穀糊口外不以自封本宗祠原建伯祖母劉氏貞節
坊右有不肖者陰鬻於勢家讚覺以已屋代贖存祠祀
焉後司訓增城有師道未幾卒於官

韓諒字道貞博羅人舉鄉賓孝友務義構一堂羣鄉黨子弟咸課諸此館穀皆取資焉每省讀至夜分年暮愈銳德造有成者甚衆萬厯丙申邑大饑每石錢千文蠲穀二百餘石助濟全活多人縣城圯義築五十餘丈人有饑寒推食食之解衣衣之一家瀟悶莫可殫述至今衣冠濟美稱世德者推爲小東門韓云

龔用宏歸善邑諸生篤學嗜古事八旬高祖怡曾祖母孔曲盡奉養萬厯庚戌淫雨城圯捐工助築丁巳歲饑施賑活多人助修學宮殿門供器咸具子克修戊午舉於鄉令漢陽有傳宏贈文林郎

巫彥新字以銘龍川諸生事親孝養葬不惜傾私財不強